

四庫全書

集部

欽定四庫全書

集部  
東漢文紀卷三

詳校官庶吉士臣陳若霖

主事銜臣徐以坤覆勘

總校官進士臣楊懋珩

校對官中書臣范 鏊

謄錄監生臣劉 璠

欽定四庫全書

東漢文紀卷三

明 梅鼎祚 編

安帝

諱祐章帝孫父清河孝王慶殤帝崩鄧太后定策迎立年在位十九年廟曰恭宗

長吏去職詔

永初元年九月

自今長吏被考竟未報自非父母喪無故輒去職者劇縣十歲平縣五歲以上乃得次用

敕司隸校尉冀并二州刺史

元年十一月

民訛言相驚棄捐舊居老弱相攜窮困道路其各敕所

部長吏躬親曉諭若欲歸本郡在所為封長檄不欲勿  
强

變異求言詔

二年六月京師及郡國大水風雨雹七月下詔

昔在帝王承天理民莫不據璇璣玉衡以齊七政朕以  
不德遵奉大業而陰陽差越變異並見萬民饑流羗貊  
叛戾夙夜克已憂心京京間令公卿郡國舉賢良方正  
遠求博選聞不諱之路冀得至謀以鑒不逮而所對皆  
循尚浮言無卓爾異聞其百僚及郡國吏人有道術明

習災異陰陽之度璇璣之數者各使指變以聞二千石  
長吏明以詔書博衍幽隱朕將親覽待以不次冀獲嘉  
謀以承天誠

外補吏詔

二年九月

王主官屬墨綬下至郎謁者其經明任博士居鄉里有  
廉清孝順之稱才任理人者國相歲移名與偕計上尚  
書公府通調令得外補

京師大饑詔

三年三月

朕以幼冲奉承鴻業不能宣流風化而感逆陰陽至今  
百姓饑荒更相噉食永懷悼歎若墜淵冰咎在朕躬非  
羣司之責而過自貶引重朝廷之不德其務思變復以  
助不逮

舉賢良方正詔

五年閏  
三月

朕以不德奉郊廟承大業不能興和降善為人祈福災  
異蜂起寇賊縱橫夷狄猾夏戎事不息百姓匱乏疲於  
徵發重以蝗蟲滋生害及成麥秋稼方收甚可悼也顛

而不扶危而不持則將焉用彼相矣公卿大夫將何以  
匡救濟斯艱危承天誡哉蓋為政之本莫若得人褒賢  
顯善聖制所先濟濟多士文王以寧思得忠良正直之  
臣以輔不逮其令三公特進侯中二千石二千石郡守  
諸侯相舉賢良方正有道術達於政化能直言極諫之  
士各一人及至孝行與衆卓異者并遣詣公車朕將親  
覽焉

詔封功臣詔

永初  
六年

夫仁不遺親義不忘勞興滅繼絕善善及子孫古之典也昔我光武受命中興恢弘聖緒橫被四表昭假上下光耀萬世祉祚流行垂於罔極予末小子夙夜永思追惟勲烈披圖按籍建武元功二十八將佐命虎臣識記有徵蓋蕭曹紹封傳繼於今況此未遠而或至乏祀朕甚愍之其餘二十八將無嗣絕世若犯罪奪國其子孫應當統後者分別署狀上將及景風章叙舊德顯茲遺功焉



蝗災詔

元初二年五月河  
南及郡國十九蝗

朝廷不明庶事失中災異不息憂心悼懼被蝗以來七  
年於茲而州郡隱匿裁言頃畝今群飛蔽天為害廣遠  
所言所見寧相副邪三司之職內外是監既不奏聞又  
無舉正天災至重欺罔臯大今方盛夏且復假貸以觀  
厥後其務消救災青安輯黎元

雨水賑卹詔

四年  
七月

今年秋稼茂好垂可收穫而連雨未霽懼必淹傷夕惕

惟憂思念厥咎夫霖雨者人怨之所致其武吏以威暴下文吏妄行苛刻鄉吏因公生姦為百姓所患苦者有司顯明其罰又月令仲秋養衰老授几杖行糜粥方今案比之時郡縣多不奉行雖有糜粥糠粃相半長吏怠事莫有躬親甚違詔書養老之意其務崇仁恕賑護寡獨稱朕意焉

崇節約詔

五年  
七月

舊令制度各有科品欲令百姓務崇節約遭永初之際

人離荒危朝廷躬自菲薄去絕奢飾食不兼味衣無二  
絲比年雖獲豐穰尚乏儲積而小人無慮不圖久長嫁  
娶送終紛華靡麗至有走卒奴婢被綺縠著珠璣京師  
尚若斯何以示四遠設張法禁慙惻分明而有司惰任  
訖不奉行秋節既立驚鳥將用且復重申以觀後效

春賜穀詔

六年  
二月

夫政先京師後諸夏月令仲春養幼小存諸孤季春賜  
貧窮賑乏絕省婦使表貞女所以順陽氣崇生長也其

賜民尤貧困孤弱單獨穀人三斛貞婦有節義十斛甄表門閭旌顯厥行

舉吏詔

延光元年八月

詔三公中二千石舉刺史二千石令長相視事一歲已上至十歲清白愛利能勅身率下防姦理煩有益於人者無拘官簿刺史舉所部郡國太守相舉墨綬隱親悉心勿取浮華

詔羣臣

皇太子為安帝乳母王聖及太長秋江京等構譏太子遂議廢立太僕來厯光

祿勲被諷等並証明太子無過帝使中  
常侍奉詔脅羣臣太子廢為濟陰王

父子一體天性自然以義割恩為天下也歷諷等不識  
大典而與羣小共為謹詳外見忠直而內希後福飾邪  
違義豈事君之禮朝廷廣開言事之路故且一切假貸  
若懷迷不反當顯明刑書

貶樂成王萇詔

萇本濟北王子嗣為樂成王驕  
淫不道有司舉奏萇罪安帝詔

萇有覲其面而放逸其心知陵廟至重承繼有禮不惟  
致敬之節肅穆之慎乃敢擅損犧牲不脩苾芬慢易大

姬不震厥教出入顛覆風淫於家娉取人妻饋遺婢妾  
毆擊吏人專已凶暴愆罪莫大甚可恥也朕覽八辟之  
議不忍致之於理其貶長爵為臨湖侯朕無則哲之明  
致簡統失序罔以尉承大姬增懷永歎

賜豫州刺史馮煥詔

洪造  
隸釋

告豫州刺史馮煥今

下闕

常為效用邊將統御

下闕

內以威

恩撫喻杜

下闕

去車鮮卑連犯鄣塞

下闕

過掩卒搗毆無距

捍下闕率攝太守以下進退

下闕

曾不表罪誅多擁

下闕

麗王

宮僞輕狡獨

下闕

織<sub>下闕</sub>絕宮不自效楚

下闕

化頃屬樂浪久

矣

下闕

當所詣設訖不定決

下闕

月左右欲來犯法

下闕

北顧

傷心

闕

煥有

下闕

冀煥能竭心盡慮有

下闕

上如不從化督

錄部

下闕

惟前後詔書以前人

下闕

侍御使便宜數上

下闕

元初六年十二月

報高句驪王遂成降詔

遂成父官屢冠邊及死遂成立朝議欲因其喪

發兵擊之安帝從尚書陳忠言宜遣

弔問因責前罪遂成詣玄菟降詔曰

遂成等桀逆無狀當斬斷菹醢以示百姓幸會赦令乞

罪請降鮮卑歲貳連年寇鈔驅畧小民動以千數而裁送數十百人非向化之心也自今以後不與縣官戰鬪而自以親附送生口者皆與贖直繚人四十匹小口半之

夏勤為司徒策文

丁孚漢  
儀通典

維元初六年三月甲子制詔以大鴻臚勤為司徒曰朕承天序惟稽古建爾於位為漢輔往率舊職敬敷五教在乎寬允左右朕躬宣力四表保乂皇家於戲實惟秉



國之均方祇厥緒時亮天工可不慎歟勤其戒之在乎寬允

一作五  
教在寬

免司空張敏策

永初六年春行大射禮敏陪位  
頓仆乃策免之策文載東觀記

今君所苦未瘳有司奏君年體衰羸郊廟禮儀仍有曠  
廢鼎足之任不可以缺重以職事留君其上司空印綬

徵郎宗等策書

謝承後漢書云建光元年公車  
賜策書徵樊英及同郡孔喬李

曷北海郎宗陳留楊倫東平王  
輔六人惟宗倫到洛餘並不至

郎宗李曷孔喬等前此徵命未肯降意恐主者玩弄禮

意不備使難進易退之人龍潛不屈其身各致嘉禮遣詣公車將以補察國政輔朕不逮

順帝

名保安帝太子坐譖廢帝崩立北鄉侯瑒中黃門孫程等復立帝在位十九年廟曰敬宗

封中黃門孫程等十九侯詔

帝初為太子為江京等所譖廢閭太

后及弟顯與馬安帝崩立北鄉侯即瑒程等遂合誅京顯復立帝。此詔在未改元前

夫表功錄善古今之通義也故中常侍長樂太僕江京黃門令劉安鈞盾令陳達與故車騎將軍閭顯兄弟謀議惡逆傾亂天下中黃門孫程王康長樂太官丞王國

中黃門黃龍彭愷孟叔李建王成張賢史汎馬國王道  
李元揚佗陳子趙封李剛魏猛苗光等懷忠憤發戮力  
協謀遂掃滅元惡以定王室詩不云乎無言不讐無德  
不報程為謀首康國協同其封程為浮陽侯食邑萬戶  
康為華容侯國為酈侯各九千戶黃龍為湘南侯五千  
戶彭愷為西平昌侯孟叔為中廬侯李建為復陽侯各  
四千二百戶王成為廣宗侯張賢為祝阿侯史汎為臨  
沮侯馬國為廣平侯王道為范縣侯李元為褒信侯揚

佗為山都侯陳予為下雋侯趙封為析縣侯李剛為枝  
江侯各四千戶魏猛為夷陵侯二千戶苗光為東阿侯  
千戶

舉賢良方正詔

延光四年十一月  
即位十二月詔

朕以不德纂承洪緒今陰陽不和疾疫為害思聞忠正  
以匡不逮其令三公卿士舉賢良方正能直言極諫之  
士各一人

後漢  
紀

改元大赦詔

永建元  
年正月

先帝聖德享祚永早棄鴻烈姦慝緣間人庶怨讟上  
干和氣疫癘為災朕奉承大業未能寧濟益至理之本  
稽弘德惠蕩滌宿惡與人更始其大赦天下賜男子爵  
人二級為父後三老孝悌力田人三級流民欲自占者  
一級鰥寡孤獨篤癰貧不能自存者粟人五斛貞婦帛  
人三匹坐法當徙勿徙亡徙當傳勿傳宗室以罪絕皆  
復屬籍其與閭顯江京等交通者悉勿考勉脩厥職以  
康我民

蠲租詔

元年十月

朕以不德統承大業虐氣流行厲疾為災重以水潦秋稼漂沒每州郡所出惻然自刻其令當輸今年租者一

切勿責

後漢紀

地震免租詔

三年正月京師漢陽地震殺人

京師地動漢陽尤甚加以比年民饑饉夙夜祇懼羣公卿士其深思古典有以消災復異救此下民忠信嘉謨靡有所諱其勿收漢陽今年田租

後漢紀

赦詔

四年  
正月

朕託王公之上涉道日寡政失厥中陰陽氣隔寇盜肆  
暴庶獄彌繁憂悴永歎疾如疾首詩云君子如祉亂庶  
遘已三朝之會朔旦立春嘉與海內洗心自新其赦天  
下從甲寅赦令以來復秩屬籍三年正月已來還贖其  
閭顯江京等知識婚姻禁錮一原除之務崇寬和敬順  
時令遵典去苛以稱朕意

封還獻珠詔

四年  
五月

海內頗有災異朝廷修政太官減膳珍玩不御而桂陽太守文鰲不惟竭忠宣暢本朝而遠獻大珠以求幸媚

今封以還之

後漢記漢陽都尉獻大珠詔云都尉不宜揚本朝而獻珠求媚

免薊部租詔

六年十一月

連年災潦冀部尤甚比蠲除實傷贍恤窮匱而百姓猶有棄業流亡不絕疑郡縣用心怠惰恩澤不宜易美損上益下書稱安民則惠其令冀部勿收今年田租芻蒿

祈嶽瀆詔

陽嘉元年二月



政失厥和陰陽隔并冬鮮宿雪春無澍雨分禱祈請靡  
神不崇深恐所在慢違如在之義今遣侍中王輔等持  
節分詣岱山東海滎陽河洛盡心祈焉

選刺史二千石詔

元年閏  
十二月

間者以來吏政不勤故災咎屢臻盜賊多有退省所由  
皆以選舉不實官非其人是以天心未得人情多怨書  
歌股肱詩刺三事今刺史二千石之選歸任三司其簡  
序先後情覈高下歲月之次文武之宜務存厥衷

地震求言詔

二年四月京師地震五月下詔

朕以不德統奉鴻業無以奉順乾坤協序陰陽災眚屢見咎徵仍臻地動之異發自京師矜矜祗畏不知所裁羣公卿士將何以匡輔不逮奉答戒異異不空設必有所應其各悉心直言厥咎靡有所諱

後漢紀其各舉敦朴士一人直言厥

咎漢中李固扶風馬融太史張衡皆對策上以固對為第一

連旱大赦詔

三年五月

昔我太宗丕顯之德假於上下儉以卹民政致康乂朕

秉事不明政失厥道天地譴怒大變仍見春夏連旱寇賊彌繁元元被害朕甚愍之嘉與海內洗心更始其大赦天下自殊死以下謀反大逆諸犯不當得赦者皆赦除之

日變詔

永和元年正月

朕秉政不明災眚屢臻典籍所忌震食為重今日變方遠地搖京師咎徵不虛必有所應羣公百僚其各上封事指陳得失靡有所諱

隴西諸郡地震詔

建康元年正月

隴西漢陽張掖北地武威武都自去年九月已來地百八十震山谷坼裂壞敗城寺殺害民庶夷狄叛逆賦役重數內外怨曠惟咎歎息其遣光祿大夫案行宣暢恩澤惠此下民勿為煩擾

增封東海王璠兄弟制詔

璠嗣為王及弟蒸鄉侯儉有孝行常分租

秩賑給諸父昆弟國相以聞順帝美之制詔大將軍三公大鴻臚

東海王璠以近蕃之尊少襲王爵膺受多福未知艱難

而能克已率禮孝敬自然事親盡愛送終竭哀降儀從事寢苦三年和睦兄弟恤養孤弱至孝純備仁義兼弘朕甚嘉焉夫勸善勵俗為國所先曩者東平孝王敞兄弟行孝喪母如禮有增戶之封詩云永世克孝念茲皇祖今增臻封五千戶儉五百戶光啓土宇以酬厥德

贈沛王廣祖母詔

廣嗣王有錮疾安帝詔廣祖母周領王家事周正明有禮

法漢安中薨  
順帝下詔

沛王祖母太夫人周秉心淑慎導王以仁使光祿大夫

贈以妃印綬

告南陽太守禮樊英詔

英字季齊南陽魯陽人有藝術公車徵至不屈

永建四年拜五官中郎將數月稱疾詔以為光祿大夫賜歸令所在致禮

五官中郎將樊英委榮辭祿不降其節今以英為光祿大夫賜歸家所在縣給穀千斛常以八月存高年致牛

一頭酒三斛

樊英別傳

告中山相朱遂詔

陽嘉元年望都蒲陰狼殺童兒九十七人中山相朱遂到

官不出奉祠

北徵詔曰

災暴緣類符驗不虛政失厥中狼災為應乃至殘食孩  
幼朝廷愍悼思惟咎徵博訪其故山嶽尊靈國所望秩  
而遂比不奉祠怠慢廢典不務懇惻淫刑放濫害加孕  
婦毒流未生感和致災其詳思改救追復所失有不遵  
憲舉正以聞

東觀  
漢記

封馬賢孫詔

東觀漢記永和  
六年十二月詔

故將軍馬賢前伐西夷尅敵深入父子三人同命其以  
漢中南鄭之武陽亭封賢孫承先為武陽亭侯食租稅

拜張綱子續為郎中詔

綱為廷尉皓之子以言忤梁冀時廣陵賊張嬰

等寇亂徐揚間十餘年冀乃以綱為廣陵太守綱單車說降之卒於郡

故廣陵太守張綱大臣之苗剖符統務正身導下班宣德信降集劇賊張嬰萬人息干戈之役濟蒸庶之困未升顯爵不幸早卒嬰等緣杖若喪考妣朕甚愍焉拜綱子續為郎中賜錢百萬

告河南尹徵張楷詔

楷字公超霸之子隱居弘農山中辟舉不就漢安元

年順帝特下詔楷復告疾



故長陵令張措行慕原憲操擬夷齊輕貴樂賤竄跡幽  
藪高志確然獨拔羣俗前此徵命盤桓未至將主者玩  
習於常優賢不足使其難進歟郡時以禮發遣

追祠太尉楊震詔策

震以正直忤中常侍樊豐等被譖收印綬自殺時連

有災異帝感震之枉乃下詔策

故太尉震正直是與俾匡時政而青蠅點素同茲在藩  
上天降威災青屨作爾卜爾筮惟震之故朕之不德用  
彰厥咎山崩棟折我其危哉今使太守丞以中牢具祠

魂而有靈儻其歆享

賜宋漢策

漢恩東平相度遼將軍以威恩著稱  
遭大僕上病拜太中大夫卒策曰

太中大夫宋漢清修雪白正直無邪前在方外仍統軍  
實懷柔異類莫非嘉績戎車載戢邊人用寧子錄乃勲  
引登九列因病退讓守約彌堅將授三事未克而終朝  
廷愍悼怛其愴然詩不云乎肇敏戎功用錫爾祉其令  
將相大夫會葬加賜錢十萬及其在殯以全素絲羔羊  
之潔焉

賜國三老袁良冊

隸釋  
詳碑

冊曰頃者連遇運害災徧備至陰陽不和寒暑不節昔  
孔子制義承奉剿有興盛之福暢期卽致來咎之變朕  
以眇身襲表繼業二九之戒今直其際圖記占

闕

煊在

藩國自先帝至德猶有七國之謀蓋治壺者不諱其難  
朕追躋社稷之重恐有交會諸國王侯開尊以驕滿之  
漸令姦邪因緣生慝相以顯遜簡練內升管掌符竟惠  
櫟我民故連拔授不問勦次典郡職重親執經緯隱括

在手注者全尊發縱於平陽青約藩輔其節衍然忠臣  
之義有獻諱去吞其加精微測切防蠱朕疚心以戎今  
特賜錢十萬雜繒世匹壬具劍佩書刀繡文印衣襪極  
手巾各一注悉乃心勉密協同便宜數上

壬王字

梁商誄

東觀漢記

孰云忠侯不聞其音背去國家都茲玄陰幽居冥冥靡  
所且窮

太傅三公封郭鎮奏

鎮延光中為尚書迎立濟陰王率羽林士擊殺衛尉

閻景再遷尚書令三公  
奏順帝乃封鎮定潁侯

鎮冒犯白刃手劍賊臣奸黨殄滅宗廟以寧功比劉章  
宜顯爵土以勵忠貞

有司奏上順帝尊號

東觀漢紀

孝順皇帝弘秉聖哲龍興統業稽前則古欽奉鴻烈寬  
裕晏晏宣恩以極躬自菲薄以崇玄默遺詔貽約顧念  
萬國衣無製新玩好不飾瑩陵損狹不起寢廟遵履前  
制敬勅慎終有始有卒孝經曰愛敬盡於事親而德教

加於百姓詩云敬慎威儀惟民之則臣請上尊號曰敬宗廟天子世世獻奉藏主袷祭進武德之舞如祖宗故事

沖帝

名炳順帝太子建康元年八月即位梁太后稱制改元永嘉正月崩年三歲

趙峻李固參錄尚書事策

應劭漢官儀

太尉趙峻二世掌典機衡有匪石不貳之心大司農李固公族之苗忠直不回有史魚之風今以峻為太傅固為太尉與大將軍冀參錄尚書事

質帝

名續肅宗玄孫渤海王鴻之子冲帝崩梁太后與梁冀定策立之在位一年為冀毒殺

正祀詔

永嘉元年五月明年改元

孝殤皇帝雖不永休祚而即位踰年君臣禮成孝安皇帝承襲統業而前世遂令恭陵在康陵之上追覽前代位第之宜先後相踰失其次序非所以奉宗廟之重垂無窮之制昔定公追正順祀春秋善之其令恭陵次康陵憲陵次恭陵以序親秩為萬世法

追覽句  
漢紀補

方春寬罰詔

本初元年正月

昔堯命四子以欽天道鴻範九疇休咎有象夫瑞以和  
降異因逆感禁微應大前聖所重頃者州郡輕慢憲防  
競逞殘暴造設科條陷入無罪或以喜怒驅逐長吏恩  
阿所私罰枉仇隙至令守闕訴訟前後不絕送故迎新  
人離其害怨氣傷和以致災青書云明德慎罰方春東  
作育微敬始其敕有司罪非殊死且勿案驗以崇在寬

賑卹二郡詔

元年  
二月

九江廣陵二郡數離寇害殘夷最甚生者失其資業死



者委屍原野昔之為政一物不得其所若已為之況我  
元元嬰此困毒方春戒節賑濟之危掩骼埋胔之時其  
調比郡見穀出稟窮弱收葬枯骸務加埋卹以稱朕意

困毒漢紀  
作饑饉

桓帝

名志章帝曾孫初封蠡吾侯質帝  
崩迎立在此二十一年廟曰威宗

舉廉吏詔

本初元年七月  
明年改元建和

孝廉廉吏皆當典城牧民禁奸舉善興化之本恒必由  
之詔書連下分明懇惻而所在玩習遂至怠慢選舉乖

錯害及元元頃雖頗繩正猶未懲改方今淮夷未殄軍  
師屢出百姓疲悴困於徵發庶望羣吏惠我勞民蠲滌  
貪穢以祈休祥其令秩滿百石十歲以上有殊才異行  
乃得參選賊吏子孫不得察舉杜絕邪偽請託之原令  
廉白守道者得信其操各明守所司將觀厥後

減陵徒刑詔

建和元年四月

比起陵塋彌厯時歲力役既廣徒隸尤勤頃雨澤不沾  
密雲復散儻或在茲其令徒作陵者減刑各六月

日蝕免禁徙詔

三年四月丁卯  
晦日有食之

蓋聞天生蒸民不能相理為之立君使司牧之君道得  
於下則休祥著乎上庶事失其序則咎徵見乎象間者  
日食毀缺陽光晦暗朕祇懼潛思匪遑啓處傳不云乎  
日食修德月食修刑昔孝章帝愍前世禁徙故建初之  
元並蒙恩澤流徙者使還故郡没入者免為庶民先皇  
德政可不務乎其自永建元年迄於今歲凡諸妖惡支  
親從坐及吏民減死徙邊者悉歸本郡唯没入者不從

此令

災異詔

永興二年二月

比者星辰繆越坤靈震動災異之降必不空發勅已修政庶望有補其興服制度有踰侈長飾者皆宜損省郡縣務存儉約申明舊令如永平故事

詔司隸校尉部刺史

二年六月

蝗災為害水變仍至五穀不登人無宿儲其令所傷郡國種蕪菁以助人食

日食又詔

二年九月  
日有蝕之

朝政失中雲漢作旱川靈涌水蝗蟲孽蔓殘我百穀太  
陽虧光饑饉薦臻其不被害郡縣當為饑餒者儲天下  
一家趣不糜爛則為國寶其禁郡國不得賣酒祠祀裁  
足

封單超等為亭侯詔

延熹二年八月帝與超等  
謀詔司隸將兵圍梁冀第

收大將軍印  
綬冀自殺

梁冀奸暴濁亂王室孝質皇帝聰敏早茂冀心懷忌畏

私行殺毒永樂太后親尊莫二冀又遏絕禁還京師使  
朕離母子之愛隔顧復之恩禍害深大罪釁日滋賴宗  
廟之靈及中常侍單超徐璜具瑗左悺唐衡尚書令尹  
勲等激憤建策內外協同漏刻之間桀逆梟夷斯誠社  
稷之祐臣下之力宜班慶賞以酬忠勲其封超等五人  
為縣侯勲等七人為亭侯

減租調詔

九年  
正月

比歲不登人多饑窮又有水旱疾疫之困盜賊徵發南

州尤甚災異日食譴告累至政亂在予仍獲咎徵其令  
大司農絕今歲調度徵求及前年所調未畢者勿復收  
責其災旱盜賊之郡勿收租餘郡悉半入

尊區貴人為孝崇皇后詔

東觀漢記

博園區貴人覆高明之懿德容淑美之嘉會於天合靈  
篤生厥躬欲報之德詩所感歎今以貴人為孝崇皇后

光祿大夫周舉喪事詔

舉建和三年卒朝廷以舉清公亮直方欲以為

宰相深痛惜之乃詔告光祿勳汝南太守

昔在前世求賢如渴封墓軾間以光賢哲故公叔見誄  
翁歸蒙述所以昭忠厲俗作範後昆故光祿大夫周舉  
性倅夷魚忠踰隨管前授牧守及還納言出入京輦有  
欽哉之績在禁闈有密靜之風予錄乃勲用登九列方  
欲式序百官亮協三事不永夙終用乖遠圖朝廷愍悼  
良為愴然詩不云乎肇敏戎功用錫爾祉其令將大夫  
以下到喪發日復會弔加賜錢十萬以旌委蛇素絲之  
節焉

後漢紀詔曰昔在前代封墓軾間所以激忠厲俗以  
光後昆故光祿大夫周舉性倅夷魚齊直同史魚入參



讚納出司京輦有密靜之風予欽乃勲將登三事不幸  
風終朕甚惜焉詩不云乎聲敏戎功用錫爾祉其賜錢  
千萬以旌素節

學生補郎舍人詔

桓帝建和初詔諸學生課試  
補官元嘉二年詔因試憲等

補郎  
舍人

書生汝南胡憲陳留

闕恭闕

爽或六十以下常以月朔

會辟雍垂白安貧童子潁川王闕通經拜太子舍人

封樊重後詔

東觀漢記桓帝永壽三年十月上  
幸雲夢至新野公主壽張敬侯主

廟乙丑

謚曰敬

存善繼絕食藉德貞武騎都尉樊演高祖父重以光武  
皇帝元舅扶助中興追封壽張侯謚曰敬祖父茂封冠  
軍平望鄉侯五國並建其二絕者嗣之

封黃瓊祁鄉侯詔

延熹元年

太尉黃瓊清儉不撓數有忠謬加以典謀深奧有師傅  
之義連在三司不阿權貴疾風知勁草朕甚嘉焉其封  
瓊祁鄉侯

封張彪鮑吉詔

延熹三年

汝南太守張彪故河南尹鮑吉與朕有潛龍之舊皆封

列侯

並後漢紀

賜應奉詔

謝承後漢書奉為武陵太守免廷嘉中武陵蠻復寇荊州車騎將軍馮緄

以奉有威恩為蠻夷所服上

請與俱征拜從事中郎詔奉

蠻夷叛逆作難積惡放恣鎔中之魚火熾湯盡當悉燹

爛以刷國恥朝廷以奉昔守南土威名播越故復式序

重任奉之廢興期在於今賜奉錢十萬駁犀方具劍金

錯把刀劍革帶各一奉其勉之

刷謝承書作雪

報橋玄詔

玄為涼州刺史諸郡餓餒玄康訖乃上聞詔報

邊穀不得妄出玄擅出於是玄有汲黯憂民之心後不

以為常

蔡邕橋玄碑

遣還南單于居車兒詔

延熹元年南單于諸部復叛張奐為北中郎將

討降之與以單于不能統理國事乃拘之上立左谷蠡都王紺桓帝詔

春秋大居正居車兒一心向化何罪而黜其遣還單于

漢紀其遣還庭攝部落

○紀作元康元年詔

詔策馮緄

緄字鴻卿宕渠人仕終廷尉

延熹初長沙蠻與零陵武陵諸夷悉反寇掠  
江陵間荊州刺史劉度南郡太守李肅並沒  
於是拜緄為車騎將軍將兵討之  
帝詔策緄荊州平定振旅還京師

蠻夷猾夏久不討攝各焚都城蹈籍官人州郡將吏死  
職之日相逐奔竄曾不反顧可愧言也將軍素有威猛  
是以擢授六師前代陳湯馮傳之徒以寡擊衆郅支夜  
郎樓蘭之戎頭懸都市衛霍北征功列金石是皆將軍  
所究覽也今非將軍誰與修復前迹進赴之宜權時之  
策將軍一之出郊之事不復內御已命有司祖於國門

詩不云乎進厥虎臣闢如虓虎鋪敦淮濱仍執醜虜將

軍其勉之

後漢書

封中常侍州輔吉成侯詔冊

建和二年○  
隸釋詳碑

蓋聞春秋之

闕

采毫毛之善大漢典制有恩澤之封輔

厯世守省恪恭位著建立之際處乎左右常伯之職同

闕

協意以亮天功往者鄭衆蔡倫行事科比其封輔為

葉吉成侯

贈中常侍樊安制詔

延熹元年八月  
○隸釋詳碑

制詔中常侍樊安宿衛歷年恭恪淑慎嬰被疾病卒  
蚤終今使湖陽邑長劉滌追歸安為騎都尉贈印綬魂  
而有靈嘉其寵榮嗚呼哀哉

褒贈中常侍曹騰制

騰以定策立桓帝功封侯至大長秋操之祖也。隸

釋云木經譙縣有曹騰碑題漢故中常侍長樂太僕特進費亭侯曹君之碑延熹三年立碑陰又刊詔策二歐趙不指此為曹騰碑陰失稽考也。○詔見梁太后碑載在制前

制曰闕中常侍費亭侯曹騰騰見克闕先帝能自奮拔

於險阻之中不陷乎羣小害已之譖遂亦

闕五

前後英

謀

闕二

進賢納

闕

踐肱之初受爵于東土厥功章然騰

守足退居約身自持遭離母憂孝行純篤

闕

慎禮紀喪

能過哀服祥有不忍遠離之恩情闕感病毀性早薨朕

甚閔焉詩曰靡不有初鮮克有終騰能終之春秋之義

旌

闕

采介呂勸為善及其在殯使兼諫議大

闕六

特進

贈費亭侯印綬魂而有靈嘉其寵榮嗚呼哀哉

祠恭懷皇后祝文

丁孚  
漢儀

孝曾孫皇帝志使有司臣太常撫風興夜處小心畏忌



不墮其身一不寧敢用絜牲一元大武柔毛剛鬣商祭  
明視鄉其嘉薦普淖醎醢豐本明粢醪用薦耐事於恭  
懷皇后尚享

嘏辭

賜皇帝福恭懷皇后命工祝承致多福無疆於爾孝曾  
孫皇帝使爾受祿於天宜稼於田眉壽萬年介爾景福  
俾守爾民勿替引之

靈帝

諱宏章帝玄孫河間孝王開之後襲父解讀  
亭侯爵桓帝崩無子實太后迎立在此二十

二年

陳蕃參錄尚書事策

應劭漢官儀

故太尉陳蕃忠亮謇諤有不吐茹之節司隸胡廣惇德允元五世從政今以蕃為太傅與廣參錄尚書事

同前

范曄後漢書桓帝崩竇后臨朝詔進蕃太傅

夫民生樹君使司牧之必須良佐以固王業前太尉陳蕃忠清直亮其以蕃為太傅錄尚書事

封陳蕃詔

後漢紀靈帝建寧元年

太傅陳蕃輔弼先帝出納惟允謇諤之節宣於本朝朕  
初踐祚親受策命忠篤之性老而彌純其封蕃為高陽  
侯

同前

范曄書靈帝即位實太后復優詔封蕃固  
讓不受。按二詔紀作靈帝書作桓思實

太后

蓋褒功以勸善表義以厲俗無德不報大雅所歎太傅  
陳蕃輔弼先帝出內累年忠孝之美德冠本朝謇諤之  
操華首彌固今封蕃高陽侯食邑三百戶

立宋皇后制詔

後漢書注

維建寧四年七月乙未制詔皇后之尊與帝齊體供奉  
天地祇承宗廟母臨天下故有華興殷姜任母周二代  
之隆蓋有內德長秋宮闕中宮曠位宋貴人乘淑媛之  
懿體山河之儀威容昭曜德冠後庭羣寮所咨人曰宜  
哉卜之著龜卦得承乾有司奏議宜稱紱組以臨兆民  
今使太尉襲使持節奉璽綬宗正祖為副立貴人為皇  
后其往踐爾位敬宗禮典肅慎中饋勿替朕命永終天

祿

消復災異制

以郎中張文上疏也

下太尉司徒司空夫瑞不虛至災必有緣朕以不德秉  
統未明以招祲偽將何以昭顯憲法哉三司任政者所  
當夙夜而各拱默訖未有聞將何以奉答天意救寧我  
人其各悉心思所崇改務消復之術稱朕意焉

追贈司空楊賜策

故司空臨晉侯賜華嶽所挺九德純備三葉宰相輔國

以忠朕昔初載授道帷幄遂階成勲以陟大猷師範之  
功昭於內外庶官之務勞亦勤止七在卿校殊位特進  
五登袞職弭難入寧雖受茅土未答厥勲哲人其萎將  
誰諮度朕甚懼焉禮設殊等物有服章令使左中郎將  
郭儀持節追位特進司空驃騎將軍印綬謚曰文烈  
侯

漢紀師範之功既昭於  
內弼亮之勤亦著於外

徵荀爽等詔

中平五年  
徵皆不至

頃選舉失所多非其人儒法雜揉學道浸微處士荀爽

陳紀鄭玄韓融張楷眇道樂古志行高潔清貧隱約為衆所歸其以爽等各補博士

徵姜肱手詔

肱彭城廣戚人博通經緯朝聘不就即拜太中大夫羸病行窳靈帝

手筆

下詔

肱抗凌雲之志養浩然之氣以朕德薄未肯降志昔許由不屈王道為化夷齊不撓周德不虧州郡以禮優順

勿失其志

謝承後漢書

少帝

名辯靈帝長子何皇后生立六月董卓廢為弘農王弑之

袁隗為太傳詔

光熹元年

朕以眇躬君王海內夙夜憂懼靡知所濟夫天地人  
道其用在三必須輔佐以昭其功後將軍袁隗德量寬重  
奕世忠恪今以隗為太傳錄尚書事朕且諒闇委成羣  
后各率其職稱朕意焉

後漢紀

獻帝

諱協靈帝中子立為皇太子帝崩何太后立所生子辨徙協為陳留王董卓廢辨立協在

位三十一年禪於魏封山陽公追謚獻帝

日食詔

初平四年正月日有食之未晡八刻太史令王立奏日晷過度無有變色朝臣



皆賀帝密候未晡一刻而蝕尚書賈誼奏立  
司候不明疑誤上下太尉周忠職所典掌請  
皆治罪  
詔不從

天道幽遠事驗難明且災異應政而至雖探道知微焉  
能不失而欲歸咎史官重益朕之不德也

後漢紀

儒生為太子舍人詔

初平四年試儒生上第賜位郎中次太子舍人下第

者罷之

詔曰

孔子歎學之不講不講則所識日忘今者儒年踰六十  
去離本土營求糧資不得專業結童入學白首空歸長

委農野永絕榮望朕甚愍焉其依科罷者聽因次第為太子舍人

報奏立長秋宮詔

興平元年帝加元服有司奏立長秋宮下詔於是奏追尊

帝母王美人

為靈懷皇后

朕稟受不弘遭值禍亂未能紹先以光故典皇母前薨

未卜宅兆禮章有闕中心如結三歲之感盖不言吉且

須其後

後漢書。漢紀詔云皇妣宅兆未卜三年之戚禮不言吉朕雖不能終身思慕其何忍言後宮

之選

乎

罪李儒詔

初董卓廢少帝為弘農王使郎中令李儒鸛殺之及卓誅其黨李儒等亂

舉儒為侍中獻帝詔惟

解以卓所為不可罰儒

儒前為弘農王郎中令迫殺我兄誠宜加罪

後漢紀

原裴茂詔

初平四年大雨漂没人庶帝使御史裴茂詣詔獄原繫者二百餘人有為

李惟所枉者惟表茂擅

出囚徒請收之詔曰

災異屢降陰雨為害使者銜命宣布恩澤原解輕微庶合天心欲釋冤結而復罪之乎一切勿問

罪侯汶詔

四年饑帝使侍御史侯汶出太倉米豆為饑人作糜賦卹不實尚書奏收

汶考實

詔曰

未忍致汶於理可杖五十

奉例詔

獻帝起居注  
帝在長安詔

三輔地不滿千里而軍師用度非一公卿以下不得奏  
除其若公田以秩石為率賦與令各自收其租稅

孫策領會稽太守詔

建安二年

董卓逆亂凶國害民先將軍堅念在平討雅意未遂厥  
美著聞策遵善道求福不回今以策為騎都尉襲爵烏

程侯領會稽太守

又詔勅

故左將軍袁術不顧朝恩坐創凶逆造合虛偽欲因兵  
亂詭詐百姓聞其言以為不然定得使持節平東將軍  
領徐州牧溫侯布上術所造惑衆妖妄知術鴟梟之性  
遂其無道修治王宮署置公卿郊天祀地殘民害物為  
禍深酷布前後上策乃心本朝欲還討術為國効節乞加  
顯異夫懸賞侯功惟勤是與故便寵授承襲前邑重以

大郡榮耀兼至是策輸力竭命之秋也其亟與布及行  
吳郡太守安車將軍陳瑀戮力一心同時赴討

吳書

拜曹操鎮東將軍襲費亭侯詔

曹操素履忠貞輔幹王室頃遭凶暴海內離析操執義  
討截黃巾為國出命夫祿以賞功罰以紂否今以操為  
鎮東將軍領兗州牧襲父費亭侯高爵并印綬符策

敕曹操

敕鎮東將軍領兗州牧費亭侯故特進顯授上將鈇鉞

之任復食舊土雙金之寵董統一州委成之重榮曜昭  
示亦以優崇投節効命自白之秋也

並藝文

令州郡罷兵詔

吳書云曹操父於泰山被殺歸咎於諫欲伐諫而畏其強乃表

獻帝詔令

州郡罷兵

今海內擾攘州郡起兵征夫勞悴寇難未弭或將吏不  
良因緣討捕侵侮黎民離害者衆風聲流聞震蕩城邑  
丘牆懼於橫暴貞良化為羣惡此何異乎抱薪救焚扇  
火止沸哉今四民流移託身佗方攜白首於山野棄稚

子於溝壑顧故鄉而哀歎向阡陌而流涕饑厄困苦亦曰甚矣雖悔往者之迷謬思奉教於今日然兵連衆結鋒鏑布野恐一朝解散夕見係虜是以阻兵屯據欲止而不敢散也詔書到其各罷遣甲士還親農桑惟留常員吏以供官署慰示遠近咸使聞知

令魏公曹操封拜諸侯守相詔

孔衍漢魏春秋曰天子以公典

任於外臨事之賞或宜速疾乃命公得承制封諸侯守相詔

夫軍之大事在茲賞罰勸善懲惡宜不旋時故司馬法



曰賞不逾日者欲民速覩為善之利也昔在中興鄧禹  
入關承制拜軍祭酒李文為河東太守來歙又承制拜  
高峻為通路將軍察其本傳皆非先請明臨事刻印也  
斯則世祖神明權達損益蓋所用速示威懷而著鴻勲  
也其春秋之義大夫出疆有專命之事苟所以利社稷  
安國家而已況君秉任二伯師尹九有實征夷夏軍行  
藩甸之外失得在於斯湏之間停賞俟詔以滯世務固  
非朕之所圖也自今以後臨事所甄當加寵號者其便

刻印章假授咸使忠義得相獎勵勿有疑焉

進魏公操為魏王詔

自古帝王雖號稱相變爵等不同至于褒崇元勲建立  
功德光啓氏姓延於子孫庶姓之與親豈有殊焉昔我  
聖祖受命初業肇基造我區夏鑒古今之制通爵等之  
差盡封山川以立藩屏使異姓親戚並列土地據國而  
王所以保乂天命安固萬嗣厯世承平臣主無事世祖  
中興而時有難易是以曠年數百無異姓諸侯王之位

朕以不德繼序弘業遭率土分崩羣兇縱毒自西徂東  
辛苦卑約當此之際唯恐溺入於難以羞先帝之聖德  
賴皇天之靈俾君秉義奮身震迅神武捍朕於艱難獲  
保宗廟華夏遺民含氣之倫莫不蒙焉君勤過稷禹忠  
侔伊周而掩之以謙讓守之以彌恭是以往者初開魏  
國錫君土宇懼君之違命慮君之固辭故且懷志屈意  
封君為上公欲以欽順高義湏俟勲績韓遂宋建南結  
巴蜀羣逆合從圖危社稷君復命將龍驤虎奮梟其元

首屠其窟棲暨至西征陽平之役親擐甲冑深入險阻  
芟夷蝥賊殄其兇醜盪定西陲懸旌萬里聲教遠振寧  
我區夏蓋唐虞之盛三后樹功文武之興旦奭作輔二  
祖成業英豪佐命夫以聖哲之君事為已任猶錫土班  
瑞以報功臣豈有如朕寡德仗君以濟而賞典不豐將  
何以答神祇慰萬民哉今進君爵為魏王使使持節行  
御史大夫宗正劉艾奉策璽玄土之社苴以白茅金虎  
符第一至第五竹使符第一至第十君其正王位以丞

相領冀州牧如故其上魏公璽綬符策敬服朕命簡恤  
爾衆克綏庶績以揚我祖宗之休命

手詔

魏王上書三辭詔  
三報不許又手詔

大聖以功德為高美以忠和為典訓故勦業垂名使百  
世可希行道制義使力行可效是以勲烈無窮休光茂  
著稷契載元首之聰明周召因文武之智用雖經營庶  
官仰歎俯思其對豈有若君者哉朕惟古人之功美之  
如彼思君忠勤之績茂之如此是以每將鎮符析瑞陳

禮命冊寤寐慨然自忘守文之不德焉今君重違朕命  
固辭懇切非所以稱朕心而訓後世也其抑志撙節勿  
復固辭

曹丕嗣位魏王詔

魏太子丕昔皇天授乃顯考以翼我皇家遂攘除羣凶  
拓定九州弘功茂績光於宇宙朕用垂拱負扆二十有  
餘載天不憖遺一老永保余一人早世潛神哀悼傷切  
丕奕世宣明宜秉文武紹熙前緒今使使持節御史大

夫華歆奉策詔授丕丞相印綬魏王璽綬領冀州牧方  
今外有遺虜遐夷未賓旗鼓猶在邊境干戈不得輟刃  
斯乃播揚洪烈立功垂名之秋也豈得修諒闇之禮究  
曾閔之志哉其敬服朕命抑弭憂懷旁祇厥緒時亮庶  
功以稱朕意於戲可不勉與

禪魏詔

丕嗣位改建安二十五年為延康元年  
獻帝以衆望在魏乃詔羣公卿士使持

節奉璽綬

禪魏王丕

朕在位三十有二載遭天下蕩覆幸賴祖宗之靈危而

復存然仰瞻天文俯察人心炎精之數既終行運在乎  
曹氏是以前王既樹神武之績今王又光曜明德以應  
其期是厯數昭明信可知矣夫大道之行天下為公選  
賢與能故唐堯不私於厥子而名播於無窮朕羨而慕  
焉今其追踵堯典禪位於魏王

光曜一作光裕

禪魏冊

咨爾魏王昔者帝堯禪位於虞舜舜亦以命禹天命不  
于常惟歸有德漢道陵遲世失其序降及朕躬大亂茲



昏羣兇肆逆宇內顛覆賴武王神武拯茲難於四方惟  
清區夏以保綏我宗廟豈予一人獲又俾九服實受其  
賜今王欽承前緒光於乃德恢文武之大業昭爾考之  
弘烈皇靈降瑞人神告徵誕惟亮采師錫朕命僉曰爾  
度克協於虞舜用率我唐典敬遜爾位於戲天之厯數  
在爾躬允執其中天祿永終君其祇順大禮享茲萬國  
以肅承天命

冊詔魏王

惟延康元年十月乙卯皇帝曰咨爾魏王夫命運否泰  
依德升降三代卜年著於春秋是以天命不于常帝王  
不一姓由來尚矣漢道陵遲為日已久安順已降世失  
其序沖質短祚三世無嗣皇綱肇虧帝典頽沮暨於朕  
躬天降之災遭無妄厄運之會值失精幽昧之期變興  
輦轂禍由閭宦董卓乘釁惡甚澆殄劫遷省御太僕宮  
廟遂使九州幅裂強敵虎爭華夏鼎沸蝮蛇塞路當斯  
之時尺土非復漢有一夫豈復朕民幸賴武王德膺符

運奮揚神武芟蕞允暴清定區夏保乂皇家今王纘承  
前緒至德光昭御衡不迷布德優遠聲教被四海仁風  
扇鬼區是以四方効珍人神響應天之厯數實在爾躬  
昔虞舜有大功二十而放勛禪以天下大禹有疏導之  
績而重華禪以帝位漢承堯運有傳聖之義加順靈祇  
紹天明命釐降二女以嬪於魏使使持節行御史大夫  
事太常音奉皇帝璽綬王其永君萬國敬御天威允執  
其中天祿永終敬之哉

又

皇帝問魏王言遣宗奉庚申書到所稱引聞之朕惟漢  
家世踰二十年過四百運周數終行祚已訖天心已移  
兆民望絕天之所廢有自來矣今大命有所底止神器  
當歸聖德違衆不順逆天不祥王其體有虞之盛德應  
厯數之嘉會是以禎祥告符圖讖表錄神人同應受命  
咸宜朕畏上帝致位於王天不可違衆不可拂且重華  
不逆堯命大禹不辭舜位若夫由卷匹夫不載聖籍固

非皇材帝器所當稱慕今使音奉皇帝璽綬王其陟帝位無逆朕命以祇奉天心焉

又

天訖漢祚辰象著明朕祇天命致位於王仍陳厯數於詔冊喻符運於翰墨神器不可以辭拒皇位不可以諫讓稽於天命致於再三且四海不可以一日曠主萬機不可以斯須無統故建大業者不拘小節知天命者不繫細物是以舜受大業之命而無遜讓之辭聖人達節不

亦遠乎今使音奉皇帝璽綬王其欽承以答天下響應之望焉

又

昔堯以配天之德秉六合之重猶覩厯運之數移於有虞委讓帝位忽如遺跡今天既訖我漢命乃眷北顧皇帝之業實有大魏朕守空名以竊古義顧視前事猶有慙色而王遜位至於三四朕用懼焉夫不辭萬乘之位者知命違節之數也虞夏之君處之不疑故勲烈垂於萬

載美名傳於無窮今遣守尚書令侍中顏喻王其速陟  
帝位以順天人心副朕之大願

廢伏皇后策

后名壽得以曹操凶殘與父完書  
令曹操完不敢發建安十九年事

露操逼帝廢后假  
為策叔后幽殺之

皇后壽得由卑賤登顯尊極自處椒房二紀於茲既無  
任姒徽音之美又乏謹身養已之福而陰懷妒害包藏  
禍心弗可以承天命奉祖宗今使御史大夫郗慮持節  
策詔其上皇后璽綬退避中宮遷於他館嗚呼哀哉自

壽取之未致於理為幸多焉

尹昆拜尚書僕射詔

謝承後漢書尹昆字闕淵為御史闕時拜尚書僕

射。北堂書鈔所引原多

訛闕未詳何帝今附再考

惟君公曹時以太守之術克獎王室其省錄臺事勿令  
謬誤

立春日下寬大書

禮儀志

制詔三公方春東作敬始慎微動作從之罪非殊死且  
勿案驗皆須麥秋退貪殘進柔良下當用者如故事



漢律布金令

丁孚漢儀曰酎金律文帝所加以正月旦作酒八月成名酎酒因合

諸侯助

祭貢金

皇帝齋宿親帥羣臣承祠宗廟羣臣宜分奉請諸侯列侯各以民口數率千口奉金四兩奇不滿千口至五百口亦四兩皆會謝少府受又大鴻臚食邑九真交趾日南者用犀角長九寸以上若璆瑁甲一鬱材用象牙長三尺以上若翡翠各二十準以當金

八能士書版言事文

商臣伯民微事羽物各一版

臣某言今月若干日甲乙日冬至黃鍾之音調君道得  
孝道褒

振子逐疫文

甲作食飢脾胃食虎雄伯食魅騰簡食不祥攬諸食咎  
伯奇食夢強梁祖門共食礫死寄生妻隨食觀錯斷食  
巨窮奇騰根共食蟲凡使十二神追惡凶赫女軀拉女  
幹節解女肉抽女肺腸女不急去後者為糧

討羌符

關右人發地得古甕中多東漢時竹簡  
獨討羌符文字尚完皆章草書載東觀

傳論

永初二年六月丁未朔二十日丙寅得車騎將軍幕府  
文書上郡屬國都中二千石守丞廷義縣令三水十月

丁未到府受印綬發夫討叛羗急急如律令

按後漢書  
安帝永初

元年夏先零羗叛遣車騎將軍鄧騭討之明年  
春為羗所敗黃長膚因据是辨安紀歲月之誤

督郵保舉博士板狀

靈帝時諸博士試甲乙科  
凡學士督書其板舉主保

之

生事愛敬喪沒如禮理易尚書孝經論語兼宗載籍窮

微聞粵師事某官經明受謝見受門徒尚五十人以上  
正席謝生三郡三人隱居樂道不求聞達身無金瘡痼  
疾三十六屬不與妖惡交通王侯賞賜行應四科經任

博士

闕

某官某甲保舉

杜氏  
通典



東漢文紀卷三

欽定四庫全書

集部  
東漢文紀卷四

詳校官庶吉士臣陳若霖

主事銜臣徐以坤覆勘

總校官進士臣楊懋珩

校對官學正臣吳垣

謄錄監生臣陸鼎

欽定四庫全書

東漢文紀卷四

明 梅鼎祚 編

明德馬皇后

伏波將軍援少女明帝后無子賈貴  
人生章帝命后養之尊為皇太后

報請封外戚詔

建初元年章帝欲封爵諸舅太后不聽明年  
夏大旱言事者以為不封外戚之故有司因  
此上奏宜依舊典太后詔報帝省詔悲歎復  
重請太后又報帝後二年封廖為順陽侯防  
為潁陽侯光為許  
陽侯皆援子后兄

凡言事者皆欲媚朕以要福耳昔王氏五侯同日俱封

其時黃霧四塞不聞澍雨之應又田蚡竇嬰寵貴橫恣  
傾覆之禍為世所傳故先帝防慎舅氏不令在樞機之  
位諸子之封裁令半楚淮陽諸國常謂我子不當與先  
帝子等今有司柰何欲以馬氏比陰氏乎吾為天下母  
而身服大練食不求甘左右但著帛布無香薰之飾者  
欲身率下也以為外親見之當傷心自勅但笑言太后  
素好儉前過濯龍門上見外家問起居者車如流水馬  
如游龍蒼頭衣綠襦領袖正白顧視御者不及遠矣故

不加譴怒但絕歲用而已冀以默愧其心而猶懈怠無  
憂國忘家之慮知臣莫若君况親屬乎吾豈可上負先  
帝之旨下虧先人之德重襲西京敗亡之禍哉

後漢書

同前 漢紀

有舊典舅氏一人封也吾非謙而不為誠昧所可耳今  
水旱連年民流滿道至有餓餒者而欲施封爵上行之  
為失政臣受之為喪軀不可明矣先帝嘗言諸王財令  
半楚淮陽吾子不當與光武帝子等今何以馬氏比陰



氏乎且陰衛尉天下稱之省中御者出不及履而至門  
此蘧伯玉之敬也又有好賢下士吐握之名新陽侯雖  
剛強微失理然有方畧據地談論一朝無雙原鹿貞侯  
勇猛誠信此三人者天下選臣豈可及哉馬氏不及陰  
氏遠矣吾不才夙夜累息常恐虧先后之法有毛髮之  
罪吾不釋也言之不舍晝夜而親屬犯之不止治喪起  
墳又不時覺是吾言之不立耳目之塞也吾萬乘主身  
服大練食不求甘左右旁人無香薰之飾衣但布帛如

是者欲以身率服衆也。以為外親見之當傷心自刻。但發笑言。太后素好儉。前過濯龍門。上見外家車如流水。馬如龍。吾亦不譴怒之。但絕其歲用。冀以默愧其心。而猶駕怠無憂。國忘家者。知臣莫若君。況親屬乎。

陰識封原鹿侯

謚曰貞弟興拜衛尉興弟就封新陽侯

### 同前

劉向列女傳。向西漢人傳。乃有東漢馬后。崇文總目以陳嬰母十六傳後人所附。

外戚橫恣。為世所傳。永平中。嘗自簡練。知舅氏不可恣。不令在樞機之位。今水旱連年。民流滿道。至有饑餓而

施封拜失宜不可且先帝言諸王財令半楚淮陽王吾子不當與先帝子等今柰何欲以馬氏比陰氏乎吾自東脩冀欲上不負先帝下不虧先人之德身服大練縑裙食不求所甘左右旁人皆無香薰之飾但布帛耳如是者欲身帥衆也以為外親見之當傷心自克但反共言太后素自喜儉前過濯龍門上見外家問起居車如流水馬如游龍蒼頭衣綠襦領袖正白顧視旁御者遠不及也亦不譴怒但絕其歲用冀以默止謹耳知臣莫

若君況親屬乎人之所以欲封侯者欲以祿食養其親  
奉修祭祀身溫飽祭祀則受大官之牲郡國既珍司農  
泰稷身則衣御府之餘繒尚未足耶必當得一縣上令  
長樂宮有負言之責內亦不愧於世俗乎

赤牘裁前過  
濯龍門至止

謹耳作與諸  
王子書誤

### 章帝重請

漢興舅氏之封侯猶皇子之為王也太后誠存謙虛柰  
何令臣獨不加恩三舅乎且衛尉年尊兩校尉有大病

如今不諱使臣長抱刻骨之恨宜及吉時不可稽留

又報章帝

吾反覆念之思令兩善豈徒欲獲謙謙之名而使帝受  
不外施之嫌哉昔竇太后欲封王皇后之兄丞相條侯  
言受高祖約無軍功非劉氏不侯今馬氏無功於國豈  
得與陰郭中興之后等邪嘗觀富貴之家祿位重疊猶  
再實之木其根必傷且人所以願封侯者欲上奉祭祀  
下求溫飽耳今祭祀則受四方之珍衣食則蒙御府餘

資斯豈不足而必當得一縣乎吾計之熟矣勿有疑也  
夫至孝之行安親為上今數遭變異穀價數倍憂惶晝  
夜不安坐卧而欲先營外封違慈母之拳拳乎吾素剛  
急有胸中氣不可不順也若陰陽調和邊境清靜然後  
行子之志吾但當含飴弄孫不能復關政矣

後漢書

同前 漢紀

吾反復念之欲令兩善豈欲獲謙虛之名而令帝受不  
外施之恩哉竇太后欲封皇父曲周侯言高祖要無軍

功非劉氏不封今馬氏無功於漢不得與陰郭中興之  
后等也今輦轂下民食不造歲湯火之憂也奈何欲以  
此時封爵舅氏令吾無面目於園陵而令帝不知稼穡  
之艱難不可明矣吾懼富貴重疊若再實木根必傷也  
且人所以欲封侯者欲以祿養親奉祭祀身溫飽也祭  
祀則受大官之賜其身則御府之餘尚未足邪而必當  
一縣封乎吾計之熟矣勿有疑至孝之行安親為上今  
遭變異穀價數倍憂惶晝夜坐起不安而欲違慈母之拳

拳吾素剛急有胸中氣不可不慎子之未冠由於父母  
已冠成人則子之志念帝人君也吾以未逾三年之故  
自吾家族故得專之穰歲之後行子之志吾但當含飴  
弄孫不能復知政

章德竇皇后

扶風平陵人大司徒融曾孫選  
立為后和帝立尊為皇太后

鄧彪為太傅輔政詔

和帝初即位十歲太后  
臨朝章和二年三月詔

先帝以明聖奉承祖宗至德要道天下清靜庶事成寧  
今皇帝以幼年煢煢在疚朕且佐助聽政外有大國賢



王並為藩屏內有公卿大夫統理本朝恭已受成夫何  
憂哉然守文之際必有內輔以參聽斷侍中憲朕之元  
兄行能兼備忠孝尤篤先帝所器親受遺詔當以舊典  
輔斯職焉憲固執謙讓節不可奪今供養兩宮宿衛左  
右厥事已重亦不可復勞以政事故太尉鄧彪元功之  
族三讓彌高海內歸仁為羣賢首先帝褒表欲以崇化  
今彪聰明康彊可謂老成黃耆矣其以彪為太傅賜爵  
關內侯錄尚書事百官總已以聽朕庶幾得專心內位

於戲羣公其勉率百僚各修厥職愛養元元綏以中和  
稱朕意焉

和熹鄧皇后

諱綏太傅禹孫選入為貴人陰后  
廢進位皇后撫瘍立安臨朝稱制

賜周馥貴人策

元興元年和帝崩乃迎皇子隆立之是為殤  
帝太后臨朝和帝葬後宮人並歸園太后賜  
周馥貴人策

朕與貴人託配後庭共歡等列十有餘年不獲福祐先  
帝早棄天下孤心焚焚靡所瞻仰夙夜永懷感愴發中

今當以舊典分歸外園惓結增歎燕燕之詩曷能喻馬  
其賜貴人王青蓋車采飾輅驂馬各一駟黃金三十斤  
雜帛三十匹白越四千端

後漢書

同前

漢紀

朕與貴人託配後庭十有餘年上天不弔先帝早棄天  
下孤心斃斃無所瞻仰貴人當以舊典歸分園外相戀  
之情感增悲歎燕燕之詩曷能喻馬其賜貴人青蓋車  
驂馬各一黃金四十斤雜綵三千匹

臨朝大赦詔

殤帝延平元年五月時帝  
誕育百餘日太后臨朝

皇帝幼冲承統鴻業朕且權佐助聽政兢兢寅畏不知  
所濟深惟至治之本道化在前刑罰在後將稽中和廣  
施慶惠與吏民更始其大赦天下自建武以來諸犯禁  
錮詔書雖解有司持重多不奉行其皆復為平民

詔司徒大司農長樂少府

元年  
六月

朕以無德佐助統政夙夜經營懼失厥衷思惟治道由  
近及遠先內後外自建武之初以至於今八十餘年官

人歲增房御彌廣又宗室坐事没入者猶託名公族甚  
可愍焉今悉免遣及掖庭宮人皆為庶民以抒幽隔鬱  
滯之情諸官府郡國侯王家奴婢姓劉及疲瘵羸老皆  
上其名務令實悉

立長安侯祜詔

殤帝崩太后與兄車騎將軍  
鄧騭定策禁中立章帝孫清

先帝聖德淑茂早棄天下朕奉皇帝夙夜瞻仰日月冀  
望成就豈意卒然顛沛天年不遂悲痛斷心朕惟平原  
王素被痼疾念宗廟之重思繼嗣之統唯長安侯祜質

性忠孝小心翼翼能通詩論篤學樂古仁惠愛下年已  
十三有成人之志親德係後莫宜於祜禮昆弟之子猶  
已子春秋之義為人後者為之子不以父命辭王父命  
其以祜為孝和皇帝嗣奉承祖宗案禮儀奏

### 策命

惟延平元年秋八月癸丑皇太后曰咨長安侯祜孝和  
皇帝懿德巍巍光於四海大行皇帝不永天年朕惟侯  
孝章帝世嫡皇孫謙恭慈順在孺而勤宜奉郊廟承統

大業今以侯嗣孝和皇帝後其審君漢國允執其中一人有慶萬民賴之皇帝其勉之哉

約敕親屬詔

告司隸校尉河南尹南陽太守

每覽前代外戚賓客假借威權輕薄認詞至有濁亂奉公為人患苦咎在執法怠懈不輒行其罰故也今車騎將軍騰等雖懷敬順之志而宗門廣大姻戚不少賓客姦猾多干禁憲其明加檢勅勿相容護

省供薦新味詔

凡省二十三種

凡供薦新味多非其節或鬱養強孰或穿掘萌芽味無所至而夭折生長豈所以順時育物乎傳曰非其時不食自今當奉祠陵廟及給御者皆湏時乃上

詔從兄鄧豹鄧康

豹為禹孫厯河南尹坐事自殺○康夷安侯珍子禹孫襲

父封厯侍

中太僕

太后詔徵和帝弟濟北河間王子男女年五歲以上四十餘人又鄧氏近親子孫三十餘人並為開邸第教學經書躬自監試尚幼者使置師保朝夕入宮撫存詔導乃詔從兄河南尹豹越騎校尉康等



吾所以引納羣子置之學官者實以方今承百王之弊  
時俗淺薄巧偽滋生五經衰缺不有化導將遂陵遲故  
欲褒崇聖道以匡失俗傳不云乎飽食終日無所用心  
難矣哉今末世貴戚食祿之家溫衣美飯乘堅驅良而  
面牆術學不識臧否斯故禍敗所從來也永平中四姓  
小侯皆令入學所以矯俗厲薄反之忠孝先公既以武  
功書之竹帛兼以文德教化子孫故能東脩不觸羅網  
誠令兒曹上述祖考休烈下念詔書本意則足矣其勉

之哉

復漢書。先公謂鄧禹也

報鄧閭

閭字季昭張掖太守訓子禹孫官侍中封西華侯

長歸冥冥往而不反

東觀漢記

封洛陽令王渙子石為郎詔

安帝永初二年鄧太后詔

夫忠良之吏國家所以為理也求之甚勤得之至寡故孔子曰才難不其然乎昔大司農朱邑右扶風尹翁歸政迹茂異令名顯聞孝宣皇帝嘉歎愍惜而以黃金百斤策賜其子故洛陽令王渙秉清脩之節蹈羔羊之義

盡心奉公務在惠民功業未遂不幸早世百姓追思為之立祠自非忠愛之至孰能若斯者乎今以渙子石為郎中以勸勞動

勉馬融制

融為郎東觀因兄子喪自劾歸太后聞之怒謂融薄詔除下制禁錮者六

年

融典校秘書不推忠盡節而羞薄詔除希望欲仕州郡免官勿罪

遺詔

安帝永寧二年二月崩在位二十年

朕以無德託母天下而薄祐不夭早離大憂延平之際  
海內無主元元危運危于累卵勤勤苦心不敢以萬乘  
為樂上欲不欺天愧先帝下不違人負宿心誠在濟度  
百姓以安劉氏自謂感徹天地當蒙福祚而喪禍內外  
傷痛不絕頃以廢病沉滯久不侍祠自力上原陵加歎  
逆唾血遂至不解存亡大分無可奈何公卿百官其勉  
盡忠恪以輔朝廷

後漢書

順烈梁皇后

諱妣大將軍商女初為貴人陽嘉元年立為后沖質崩立桓帝皆以皇太

后臨朝  
東政

詔詰樂巴

巴徵拜尚書順帝崩營起憲陵主者欲侵毀左右墳塚巴上書告諫時梁

太后臨朝詔詰巴巴  
坐抵罪禁錮還家

大行皇帝晏駕有日卜擇陵園務崇省約塋域所極裁  
二十頃而巴虛言主者壞人塚墓事既非實寢不報下  
巴猶固遂其愚復上誹謗苟肆狂瞽益不可長

立建平侯續詔

後漢紀冲帝崩大將軍梁冀欲立幼主而專其權與太后定策

禁中立章帝之後建  
平侯續是為質帝

先帝早棄天下，胤嗣幼冲，何悟倉卒仍遭不造？惟太后定之，考人神之誠，惟建平侯續幼而岐嶷，師傅不煩年已八歲，克昌化之形於體貌，春秋之義為人後者為之子，其以續為孝順皇帝嗣。

永嘉元年五月大旱詔

冲帝永嘉元年正月崩，質帝是月即位。

朕以不德，託母天下，布政不明，每失厥中。自春涉夏，大旱炎赫，憂心京京，故得禱祈，明祀冀蒙潤澤。前雖得雨，而宿麥頗傷，比日陰雲還復，開霽寤寐，永歎重懷，慘結

將二千石令長不崇寬和暴刻之為乎其令中都官繫囚罪非殊死考未竟者一切任出以須立秋郡國有名山大澤能興雲雨者二千石長吏各潔齋請禱竭誠盡禮又兵役連年死亡流離或支骸不歛或停棺莫收朕甚愍焉昔文王葬枯骨人賴其德今遣使者案行若無家屬及貧無資者隨宜賜卹以慰孤魂

太學詔

順帝感翟輔之言更修黌宇增甲乙科太初元年梁太后詔自是遊學漸盛○

監本後漢書

作太初誤

大將軍下至六百石悉遣子就學每歲輒於鄉射月一饗會之以此為常

立蠡吾侯志詔

質帝崩太尉李固欲立清河王詡梁冀畏其嚴明與太后建策

禁中立章帝曾孫蠡

吾侯志是為桓帝

孝質皇帝胤嗣不遂奄忽天昏以社稷之重考宗室之賢莫若蠡吾侯志年已十五嘉姿卓茂又近為孝順皇

帝嗣

後漢紀

增濟北王次封戶詔

次嗣立九歲喪父至孝桓帝建和元年梁太后下詔



濟北王次以幼年守藩躬履孝道父沒哀慟焦毀過禮  
草廬土席衰杖在身頭不批沐體生瘡腫諒闇已來二  
十八月自諸國有憂未之聞也朝廷甚嘉焉書不云乎  
用德章厥善詩云孝子不匱永錫爾類今增次封五千  
戶廣其土宇以慰孝子惻隱之勞

費亭侯曹騰之國詔

隸釋曹騰碑陰此詔  
在桓帝贈曹騰制前

惟建和元年七月廿二日己巳皇太后曰其遣費亭侯  
之國為漢藩輔臨君境內母有出

闕六  
字

變卒

闕七  
字

百姓

不可不愛不愛則不附大臣不親百姓不附不附可不

慎  
下闕

卹災詔

建和三年冬是歲日食地震  
星孛大水雨內災異屢見

朕攝政失中災眚連仍三光不明陰陽錯序監寐寤歎  
疾如疾首今京師廝舍死者相枕郡縣阡陌處處有之  
甚違周文掩骼之義其有家屬而貧無以葬者給直人  
三千喪主布三匹若無親屬可於官塲地葬之表識姓  
名為設祠祭又徒在作部疾病致醫藥死亡厚埋藏民

有不能自振及流移者稟穀如科州郡檢察務崇恩施  
以康我民

歸政詔

桓帝和平元年太  
后詔二月太后崩

曩者遭家不造先帝早世永惟大宗之重深思嗣續之  
福詢謀台輔稽之兆占既建明哲克定統業天人協和  
萬邦咸寧元服已加將即委付而四方盜竊頗有未靜  
故假延臨政以須安謐幸賴股肱禦侮之助殘醜消蕩  
民和年稔普天率土遐邇洽同遠覽復子明辟之義近

慕先姑歸授之法及今令辰皇帝稱制羣公卿士虔恭

爾位戮力一意勉同斷金展也大成則所望矣

後漢紀  
詔云曩

者遭家不造大禍薦臻欽惟宗廟之重社稷之大爰立  
明哲將即委授而東南西北醜類未賓故且總攝助理  
萬機今悉討除遠慕復子明  
辟之義其及今辰皇帝稱制

遺詔

和平元年春太后病篤乃御輦幸宣德殿  
見官省官屬及諸梁兄弟詔曰。此似口

語非詔  
書也

朕素有心下結氣從間以來加以浮腫逆害飲食寢以  
沈困比使內外勞心請禱私自忖度日夜虛劣不能復

與羣公卿士共相終竟援立聖嗣恨不久育養見其終始今以皇帝將軍兄弟委付股肱其各自勉焉

有司請立長秋宮

順烈皇后初為貴人特被引御陽嘉元年有司奏立為皇

后桓帝立尊為皇太后

乘氏侯商先帝外戚春秋之義娶先大國梁小貴人宜

配天祚正位坤極

並後漢書

漢雜事秘辛

建和元年四月丁亥保林吳妲以丙戌詔書下中常侍

超曰朕聞河洲窈窕明辟思服擇賢作儷隆代所先故  
大將軍乘氏忠侯商所遺少女有貞靜之德流聞禁掖  
其與姁並詣商第周視動止審悉幽隱其母諱匿朕將  
採焉姁即與超以詔書趨詣商第第內謹譟食時商女  
女瑩從中閣細步到寢姁與超如詔書周視動止俱合  
法相超留外舍姁以詔書如瑩燕處屏斥接侍閉中閣  
子時日晷薄辰穿照蜃窓光送著瑩面上如朝霞和雪  
艷射不能正視目波澄鮮眉嫵連卷朱口皓齒修耳懸

鼻輔屬頤頤位置均適姁尋脫瑩步搖伸髻度髮如黝  
髻可鑒圓手八盤墜地加半握已乞緩私小結束瑩面  
發頰抵攔姁告瑩曰官家重禮借見朽落緩此結束當  
加鞠翟耳瑩泣數行下閉目轉面內向姁為手緩捧著  
日光芳氣噴襲肌理膩潔拊不留手規前方後築脂刻  
玉胸乳菽發臍容半寸許珠私處墳起為展兩股陰溝  
渥丹火齊欲吐此守禮謹嚴處女也約畧瑩體血足榮  
膚膚足飾肉肉足冒骨長短合度自顛至底長七尺一

寸肩廣一尺六寸臀視肩廣減三寸自肩至指長各二尺七寸指去掌四寸肖十竹萌削也髀至足長三尺二寸足長八寸跽附豐妍底平指歛約縑迫袂收束微如禁中久之不得音響姁令催謝皇帝萬年瑩乃徐拜稱皇帝萬年若微風振簫幽鳴可聽不痔不瘍無黑子創陷及口鼻腋私足諸過臣妾姁女賤愚慙言不宣心書不符見謹秘緘昧死以聞時夜漏三下太后猶御壽安殿發緘歡喜顧語帝曰吾入宮後知有幼妹然中外隔



潤目所未見不謂爭達如爾明日詔下有司議禮有司  
奏曰謹按春秋迎王后于紀在途則稱后故大將軍乘  
氏忠侯商女今大將軍參錄尚書事乘氏侯冀女弟膺  
紹聖善舊協潛邸結婚之際有命既集宜備禮章時進  
徵幣請下三公太常案禮儀奏可一準孝惠皇帝納后  
故事於六月癸未皇帝制詔大將軍參錄尚書事乘氏  
侯冀乾施坤受實始人經不有配儼曷奉天地宗廟爰  
謀公卿咸謂宜率前典令使使持節太常弘宗正千秋

以禮納采主人曰皇帝嘉命訪婚陋族備數采擇臣父  
故大將軍乘氏忠侯商之遺女未閤訓誠衣履若而人  
欽承前典肅奉儀制大將軍參錄尚書事乘氏糞土臣  
冀頓首再拜承制乙酉皇帝制詔大將軍參錄尚書事  
乘氏侯冀兩儀配儼承天統物正位於內必踈令族重  
申舊典令使使持節太常弘宗正千秋以禮問名主人  
曰皇帝嘉命使者弘到重宣中詔問臣名族臣女弟女  
瑩父母所生先臣故九江太守定陵鄉侯統之遺玄孫

先臣故褒親愍侯疎之曾孫先臣故少府特進乘氏侯  
雍之孫先臣故大將軍乘氏忠侯商之遺女外出自先  
臣故侍中鮑陽侯萬全之外曾孫先臣故大鴻臚鮑陽  
侯桂之外孫年十六欽承前典肅奉儀制戊子皇帝制  
詔大將軍參錄尚書事乘氏侯翼人謀龜從僉曰貞吉  
敬從典禮令使使持節太常弘宗正千秋以禮納吉主  
人曰皇帝嘉命使者弘重宣中詔大卜元吉臣陋族卑  
鄙憂懼不勝欽承前典肅奉儀制辛卯皇帝制詔大將

軍參錄尚書事乘氏侯冀之女弟有母儀之德窈窕之  
姿如山如河宜奉宗廟永承天祚以黃金二萬斤馬十  
二匹玄纁縠璧以章典禮今使使持節司徒戒太常弘  
以禮納徵主人曰皇帝嘉命降婚卑陋崇以上公寵以  
典禮備物典策欽承前典肅奉儀制甲午皇帝制詔大  
將軍參錄尚書事乘氏侯冀謀於公卿大筮元龜罔有  
不臧率遵典禮今使使持節太常弘宗正千秋以禮請  
期主人曰皇帝嘉命使弘重宣中詔吉日惟今月庚子

可迎臣欽承前典肅奉儀制庚子皇帝制詔大將軍參  
錄尚書事乘氏侯冀歲吉月令吉日惟庚子率禮以迎  
今使使持節太尉喬司徒戒以迎主人曰皇帝嘉命使  
者喬重宣中詔令月吉辰備禮以迎上公宗卿兼至副  
介近臣百兩駉蟻之族猥承大禮憂悚惶悸欽承前典  
肅奉儀制后服紺上玄下假髻步搖八雀九華十二鎮  
加以翡翠朱舄祿乘法駕重翟羽蓋金根車駕青交路  
青幃裳攄畫輶黃金塗五末蓋蚤施金華駕駟馬龍旗

九旂大將軍妻參乘太僕妻御車府令設鹵簿屬車四十六乘前鸞旗車皮軒鳳皇闔戟九旂雲罕金鉦黃鉞洛陽令奉引公卿五官校尉司隸校尉河南尹妻皆乘其官車帶夫本官綬以從置虎賁羽林騎戎頭黃門鼓吹五時副車女騎夾轂執法御史在前五將導騎千乘萬騎引至闕下自皇漢迎后未有若斯之盛也至八月乙未詔曰維建和元年八月乙未制詔故大將軍乘氏忠侯商女女瑩朕聞任姒佐周綿運八百良以德重黃裳

足奉宗廟也朕以寡昧承嗣厯服爰求英淑共臨海內  
惟爾夙閑內戒德冠後庭有夭桃之宜協和鳴之祥宜  
升尊位母儀天下今使太尉喬使持節奉璽綬宗正千  
秋為副立爾為皇后其敬慎中饋以踐乃位無替朕命  
永奠坤維后即位於章德殿太尉使持節奉璽綬天子  
臨軒陞設虎賁旄頭五牛旗百官陪臣皇后北面太尉  
往蓋下東向宗正大長秋西向宗正讀策文畢皇后稱  
臣妾皇帝萬年畢佳位太尉喬授璽綬中常侍超長跪

受璽綬奏於殿前女史授婕妤婕妤長跪受以授昭儀  
昭儀長跪受以帶皇后皇后伏起拜稱臣妾皇帝萬年  
訖黃門鼓吹三通鳴鼓畢羣臣以次出后即位大赦天

下楊慎題云漢雜事一卷得於安寧州王知州董氏前有義烏王子充印益子充使雲南時篋中書也然御覽諸書亦有漢雜事而畧不見叔此特載漢桓帝懿獻梁皇后被遜及六禮冊立事而吳始入后燕處審視一段最為奇艷但大穢褻耳不謂冀威赫震人猶得讀逃如此卷首有秘辛二字不可解要是卷帙甲乙名目余嘗按考弓足原始不得及見約繚迫祿收束微如禁中語則纏足後漢已有之言脫於口追駟不及聊志於此用塞疎漏之誚。胡震亨跋云按桓帝初為蠡吾侯梁太后欲以女弟女瑩妻之徵至京師會賈帝崩因立之



其明年立女瑩為后袁宏後漢紀范曄書帝后兩紀李  
固傳並詳之后紀有司請徵引春秋在遼撫后正謂前  
曾結婚也不應復下詔審視即其故事詔中亦應畧及  
之今第云貞靜之德流聞禁掖故也又劉昭禮儀志注  
云漢立皇后國禮之大而志無其儀取蔡質所記靈帝  
五宋后儀以備闕此書較多審視及六禮節次又在宋  
后前宣卿注志舊稱博悉不應舍此引彼即位儀亦與  
注多同雖用修復生不能判此疑案也○姚士粦云余  
始讀漢雜事目賦情搖謂非漢人不能作及見孝懷跋  
語該引詳駁抵牾灼然乃更發書檢較復得可疑者數  
則按雜事所載立后儀並同宋后固無論即后所服稱  
紺上玄下八雀九華皆廟見所著若十二鏤是親蠶飾  
不宜於大婚之時合併而服也且鹵簿大駕與劉昭親  
蠶注不與眉髮而六禮版辭亦見沈約宋書宋書云晉  
穆帝將納何后太常王彪之謂六禮宜依漢舊今考雜  
事及晉版辭一則曰欽承舊章肅奉典制一則曰欽承

前典肅奉儀制此豈彪之所云華嶠改定而有異同邪禮使有太常弘不知為誰其曰中常侍超單超也曰司徒戒趙戒也注曰蜀郡人曰太尉喬杜喬也但梁冀初欲厚禮納徵喬執不從冀遂於是年十一月殺喬朝廷此時寧敢拂冀遣喬為使至於宗正千秋惟安帝時有劉千秋為宗正去此幾四十年不應尚居此官末復有大赦天下語則建和元年八月乙未立后之下曾無此文雖此年十一月有減天下死罪一等語然與立后絕不相蒙當是仍襲宋后舊文耳惟以后生年推之用合商妻陰夫人所卒之年則后生於永建五年陰卒於陽嘉四年是生六歲而母始喪也於理稍不肯戾又后紀注曰乘馬四匹馬也雜事乃云馬十二匹更檢晉志云漢高后制聘后黃金二百斤馬十二匹此則雜事較有所據足補悉依孝惠皇帝納后故事注余因念作偽者必非不讀漢書何至自開鑿實如此且審識一段描寫精瑩若有生氣似非假托可到恐秘記史官各有依據未可指為贗作也

有司上梁太后奏

後漢書桓帝初為蠡吾侯太后徵女弟欲與為婚未及嘉

禮會贊帝崩因立帝有司奏太后建和元年立為后恃寵見疎怨恚薨

春秋迎王后于紀在塗則稱后今大將軍冀女弟膺紹聖善結婚之際有命既集宜備禮章時進徵幣三公太常案禮儀

桓思竇皇后

諱妙章大將軍武女初為貴人梁后薨進為皇后靈帝立尊為皇太后武

為宦官所害遣

太后南宮雲臺

立解瀆亭侯宏詔

後漢紀桓帝崩無嗣大將軍竇武與太后定策禁中立解

漬亭侯長之子宏  
是為靈帝太后詔

大行皇帝德配天地光照上下不獲胤嗣之祚早棄萬  
國朕憂心摧傷追覽前代法王后無適即擇賢立親考  
德叙才莫若解漬亭侯宏年十有二歲然有周成之質  
春秋之義為人後者為之子其以宏為大行皇帝嗣

賜段熲詔

東羌先零等自覆沒馬賢後數為寇  
逆靈帝建寧元年春熲為護羌校尉

將萬餘人從彭陽直指高平大破之  
竇太后臨朝下詔拜熲破羌將軍

先零東羌歷載為患熲前陳狀欲必掃滅涉履霜雪兼

行晨夜身當矢石感厲吏士曾未浹日凶醜奔破連尸  
積俘掠獲無算洗雪百年之逋負以慰忠將之亡魂功  
用顯著朕甚嘉之須臾盡定當并錄功勤今且賜錢  
二十萬以家一人為郎中敕中藏府調金錢綵物增  
助軍費

靈帝何皇后

南陽宛人生少帝  
即位尊為皇太后

廢少帝策

靈帝崩立何后子辯董卓統兵入自  
為司空脅太后廢帝立陳留王協是

為獻帝遷太后以  
弒崩復鳩殺少帝

皇帝在喪無人子之心威儀不類人君今廢為弘農王

後漢書

廢少帝立陳留王策

獻帝起居注。禹按此即  
晁書前策也。晁書及後漢

紀並稱董卓逼何太后為廢帝策是偕命太  
后也。起居注所載乃併斥太后則更出何人  
命策耶。卓雖凶偕尚在臣列  
無以臣策君之理疑不可曉

孝靈皇帝不究高宗眉壽之祚早棄臣子皇帝承紹海  
內側望而帝天姿輕佻威儀不恪在喪慢惰衰如故焉  
凶德既彰淫穢發聞損辱神器忝污宗朝皇太后教無

母儀統政荒亂永樂太后暴崩衆論惑焉三綱之道天地之紀而乃有闕罪之大者陳留王協聖德偉茂規矩邈然豐下兄上有堯圖之表居喪哀戚言不及邪岐嶷之性有周成之懿休聲美稱天下所聞宜承洪業為萬世統可以承宗廟廢皇帝為弘農王皇太后還政

永樂太后

本解嬪侯莢董夫人生靈帝尊為孝仁皇后宮稱永樂與何太后不協暴崩

獻帝伏皇后

名壽不期侯完之女瑯琊東武人

與父完書

曹操為司空時董承等謀操被誅后與父完  
以書示其妻弟樊普普封呈操遂逼帝廢后  
勒兵收后下  
暴室幽殺之

司空殺董承帝方為報怨

獻帝  
春秋

東海王彊

光武長子郭皇后生立為皇太子十七  
年而廢郭后封東海兼食魯郡因都魯

謝明帝疏

永平元年彊病臨命疏謝  
上覽悲慟喪事贈以殊禮

臣蒙恩得備蕃輔特受二國宮室禮樂事事殊異巍巍  
無量訖無報稱而自修不謹連年被疾為朝廷憂念皇  
太后陛下哀憐臣彊感動發中數遣使者太醫令丞方



伎道術絡繹不絕臣伏惟厚恩不知所言臣內自省視  
氣力羸劣日夜浸困終不復望見闕廷奉承幃幄孤負  
重恩銜恨黃泉身既天命孤弱復為皇太后陛下憂慮  
誠悲誠慙息政小人也猥當襲臣後必非所以全利之  
也誠願還東海郡天恩愍哀以臣無男之故處臣三女  
小國侯此臣宿昔常計今天下新罹大憂惟陛下加供  
養皇太后數進御餐臣彊因劣言不能盡意願並謝諸  
王不意永不復相見也

東平王蒼

光武子明帝同母弟建初八年薨詔上章奏書記賦頌七言別字歌詩為記

諫明帝校獵書

蒼拜驃騎將軍留輔政永平四年春車駕近出城第當遂校獵

河內蒼上書

諫帝即還宮

臣聞時令盛春農事不聚衆興功傳曰田獵不宿食飲  
不享出入不節則木不曲直此失春令者也臣知車駕  
今出事從約省所過吏人諷誦甘棠之德雖然動不以  
禮非所以示四方也惟陛下因行田野循視稼穡消搖  
仿佯弭節而旋至秋冬乃振威靈整法駕備周衛設羽

旄詩云抑抑威儀惟德之隅臣不勝憤懣伏自手書乞  
諸行在所極陳至誠

請歸職疏

蒼在朝數載多所匡益自以至親輔  
政聲望日重上疏歸職優詔不聽五

年乃許

還國

臣蒼疲駑特為陛下慈恩覆護在家被教導之仁升朝  
蒙爵命之首制書褒美班之四海舉負薪之才升君子  
之器凡匹夫一介尚不忘簞食之惠況臣居宰相之位  
同氣之親哉宜當暴骸膏野為百僚先而愚頑之質加

以固病誠羞負乘辱汙輔將之位將被詩人三百赤紱  
之刺今方域晏然要荒無倣將遵上德無為之時也文  
官猶可併省武職尤不宜建昔象封有鼻不任以政誠  
由愛深不忍揚其過惡前事之不忘來事之師也自漢  
興以來宗室子弟無得在公卿位者惟陛下審覽虞帝  
優養母弟遵承舊典終卒厚恩乞上驃騎將軍印綬退  
就蕃國願蒙哀憐

薦吳良疏

良初為郡吏有名蒼為驃騎將軍聞  
而辟之署西曹因上疏薦上以章示

尚書拜

議郎

臣聞為國所重必在得人報恩之義莫大薦士竊見臣  
府西曹掾齊國吳良資質敦固公方廉恪躬儉安貧白  
首一節又治尚書學通師法經任博士行中表儀宜備  
宿衛以輔聖政臣蒼榮寵絕矣憂責深大私慕公叔同  
升之義懼於臧文竊位之罪敢秉愚瞽犯冒嚴禁

明帝詔報

前以事見良鬚髮皓然衣冠甚偉夫薦賢助國宰相之

職蕭何舉韓信設壇而拜不復考試今以良為議郎

諫章帝起陵邑疏

帝欲為原陵顯節陵起縣邑蒼聞疏諫帝從而止

伏聞當為二陵起立郭邑臣前頗謂道路之言疑不審  
實近令從官古霸問涅陽主疾使還乃知詔書已下竊  
見光武皇帝躬履儉約之行深覩始終之分勤勤懇懇  
以葬制為言故營建陵地具稱古典詔曰無為山陵陂  
池裁令流水而已孝明皇帝大孝無違奉承貫行至於  
自所營創尤為儉省謙德之美於斯為盛臣愚以園邑

之興始自強秦古者丘隴且不欲其著明豈况築郭邑  
建都郭哉上違先帝聖心下造無益之功虛費國用動  
搖百姓非所以致和氣祈豐年也又以吉凶俗數言之  
亦不欲無故繕修丘墓有所興起考之古法則不合稽  
之時宜則違人求之吉凶復未見其福陛下履有虞之  
至性追封禩之深思然懼左右過議以累聖心臣蒼誠  
傷二帝純德之美不暢於無窮也惟蒙哀覽

辭恩禮疏

蒼入見讚勿稱名升殿乃拜章帝親  
答之蒼以受恩過禮疏辭帝省歎息

愈褒

貴馬

臣聞貴有常尊賤有等威卑高列序上下以理陛下至德廣施慈愛骨肉既賜奉朝請咫尺天儀而親屈至尊降禮下臣每賜譙見輒興席改容中官親拜事過典故臣惶怖戰慄誠不自安每會見蹶躅無所措置此非所以示羣下安臣子也

南北郊冠服議

東觀書曰永平二月正月公卿議春南北郊東平王蒼議

孔子曰行夏之時乘殷之輅服周之冕為漢制法高皇



帝始受命創業制長冠以入宗廟光武受命中興建明  
堂立辟雍陛下以聖明奉遵以禮服龍袞祭五帝禮缺  
樂崩久無祭天地冕服之制按尊事神祇潔齋盛服敬  
之至也日月星辰山龍華藻天王袞冕十有二旒以則  
天數旂有龍章日月以備其文今祭明堂宗廟圓以法  
天方以則地服以華文象其物宜以降神明肅雍備思  
博其類也天地之禮冕冠裳衣宜如明堂之制

世祖廟樂舞議

東觀書曰永平三年八月公卿奏議世祖廟登歌八佾舞名東

平王蒼議詔可進

武德之舞如故

漢制舊典宗廟各奏其樂皆不相襲以明功德秦為無  
道殘賊百姓高皇帝受命誅暴元元各得其所萬國咸  
熙作武德之舞孝文皇帝躬行節儉除誹謗去肉刑澤  
施四海孝景皇帝制昭德之舞孝武皇帝功德茂盛威  
震海外開地置郡傳之無窮孝宣皇帝制盛德之舞光  
武皇帝受命中興撥亂反正武暢方外震服百蠻戎狄  
奉貢宇內治平登封告成修建三雍肅修典祀功德巍

魏比隆前代以兵平亂武功盛大歌所以詠德武所以  
象功世祖廟樂舞名宜曰大武之舞謹採百官頌可登  
歌者一章四句以為曲

上言明德皇后配享議

謝承後漢書建初四年  
章帝以公卿所奏明德

皇后在世祖廟坐位  
駁議示蒼蒼上言

文武宣元祿食高廟皆以后配先帝所制典法設張大  
雅曰昭茲來許繩其祖武又曰不愆不忘率由舊章明  
德皇后宜配孝明皇帝於世祖廟同席而供饌

沛王輔

光武子郭皇后生初封中山王改封沛號為賢王

上明帝論雨書

東觀漢記輔善京氏易永平五年京師少雨上御雲臺自卦以

周易林占之其繇曰蠱封穴戶大雨時至上以問輔輔上書

蹇艮下為山坎上為水山雲為蠱穴居知雨將至故以

蠱為興

廣陵王荆

明帝同母弟後坐祝詛自殺

詐郭況與東海王彊書

彊立為太子母郭后廢彊願備蕃國封東海王

荆封山陽王及光武崩大行在前殿荆哭不哀而作飛書封以方底令蒼頭詐稱東海王

彊舅大鴻臚郭況書與彊彊封書上之明  
帝秘其事令荆出止河南官徒封廣陵

君王無罪猥被斥廢而兄弟至有束縛入牢獄者太后  
失職別守北宮及至年老遠斥居邊海內深痛觀者酸  
鼻及太后尸柩在堂洛陽吏以次捕斬賓客至有一家  
三尸伏堂者痛甚矣今天下有喪弓弩張設甚備間梁  
松救虎賁史曰吏以便宜見非勿有所拘封侯再難得  
也郎官竊悲之為王寒心累息今天下爭欲思刻賊王  
以求功寧有量邪若歸併二國之衆可聚百萬君王為

之主鼓行無前功易於太山破雞子輕於四馬載鴻毛  
此湯武兵也今年軒轅星有白氣星家及喜事者皆云  
白氣者喪軒轅女主之位又太白前出西方至午兵當  
起又太子星色黑至辰日輒變赤夫黑為病赤為兵王  
努力卒事高祖起亭長陛下興白水何況於王陛下長  
子故副主哉上以求天下事必舉下以雪除沉沒之恥  
報死母之讐精誠所加金石為開當為秋霜無為檻羊  
雖欲為檻羊又可得乎竊見諸相工言王貴天子法也

金史卷一百一十五  
卷四  
人主崩亡間閭之伍尚為盜賊欲有所望何況王邪夫  
受命之君天子所立不可謀也今新帝人之所置彊者  
為右願君為高祖陛下所志無為扶蘇將閭叫呼天也

後漢

書

梁王暢

明帝子母陰貴人有寵初  
封汝南王章帝時徙封

辭謝和帝書

永元五年豫州刺史梁相舉奏暢  
不道削成武單父二縣暢慙懼上

疏帝  
報

臣天性狂愚生在深宮長養傳母之手信惑左右之言

及至歸國不知防禁從官侍吏利臣財物熒惑臣暢臣暢無所昭見與相然諾不自知陷死罪以至考案肌慄心悸自悔無所復及自謂當即時伏顯誅魂魄去身分歸黃泉不意陛下聖德枉法曲平不聽有司橫貸赦臣戰慄連月未敢自安上念以負先帝而令陛下為臣收汙天下誠無氣以息筋骨不相連臣暢知大貸不可再得自誓束身約妻子不敢復出入失繩墨不敢復有所橫費租入有餘乞裁食睢陽穀孰虞蒙寧陵五縣還餘



所食四縣臣暢小妻三十七人其無子者願還本家自  
選擇謹救奴婢二百人其餘所受虎賁官騎及諸工技  
鼓吹蒼頭奴婢兵弩廐馬皆上還本署臣暢以骨肉近  
親亂聖化汙清流既得生活誠無心面目以凶惡復居  
大宮食大國張官屬藏什物願陛下加大恩開臣自悔  
之門假臣遷善之路令天下知臣蒙恩得去死就生頗  
能自悔臣以公卿所奏臣罪惡詔書常置於前晝夜誦  
讀臣小人貪見明時不能即時自引惟陛下哀臣令得

喘息漏刻若不聽許臣實無顏以久生下入黃泉無以見先帝此誠臣至心臣欲多還所受恐天恩不聽許節量所留於臣暢饒足

和帝詔報梁王暢

朕惟王至親之屬淳淑之美傳相不良不能防邪至今有司紛紛有言今王深思悔過端自克責朕惻然傷之志匪由於咎在彼小子一日克已復禮天下歸仁王其安心靜息茂率休德易不云乎一謙而四益小有言終

吉強食自愛

後漢書。漢紀有言作彰於內外末云其何讓哉

清河王慶

章帝子母宋貴人初立為太子竇皇后寵盛諧廢慶為清河王而殺貴人子祐

入繼是為安帝追尊父為孝德皇帝

清河下令

寡人生於深宮長於朝廷仰恃明主垂拱受成既以薄祐早離顧復屬遭大憂悲懷感傷蒙恩大國職惟藩輔新去京師憂心熒熒夙夜屏營未知所立益聞智不獨理必須明賢今官屬並居爵任失得是均庶望上遵策


戒下免悔咎其糾督非枉明察典禁無令孤獲怠慢之  
罪焉

病篤上鄧太后書

臣國土下濕願乞骸骨下從貴人於樊濯雖歿且不朽  
矣及今口目尚能言視冒昧干請命在呼吸願蒙哀憐  
有司上言追尊清河王

清河孝王至德淳懿載育明聖承天奉祚為郊廟主漢  
興高皇帝尊父為太上皇宣帝號父為皇考序昭穆置

園邑太宗之義舊章不忘宜上尊號曰孝德皇帝皇妣  
左氏曰孝德后孝德皇母宋貴人追謚曰敬隱后



東漢文紀卷四